

PUKKE!
vir al u kleurbaadjies
**Johan Claassen
Broers**
(Edms.) Bpk.
Tel. 3612,
POTCHEFSTROOM.
Kerkstraat 92.
Tak: Tomstraat 100.

**CACHET
APTEEK**
Groot genoeg om u te
bedien.
Klein genoeg om u te ken.
★
**DIE
STUDENTE-APTEEK**

Studenteraad kry nuwe struktuur



Die huidige Studenteraad na 'n warm vergadering met die rektor, prof. H. J. J. Bingle. (Foto: Fotokuns.)

DIE STUDENTERAAD sal voortaan uit negentien lede bestaan. 'n Nuwe hoofliggaam is in die lewe geroep terwyl die ondervoorsitter soos die voorsitter deur die massa gekies sal word.

Dit is enkele van die grondwetlike veranderings wat deur die Studenteraad op hulle vorige vergadering goedgekeur is. Aanbevelings in die verband is gedoen deur 'n kommissie wat moes ondersoek instel na die struktuur van die Studenteraad. Die kommissie was onder voorsitterskap van mnr. Pieter Mulder, S.R.-voorsitter.

STAGNASIE

In sy verslag wys die kommissie daarop dat ons daarteen moet waak om nie te stagneer of vas te val in bestaande strukture nie. Omstandighede rondom die struktuur verander dikwels só dat die struktuur later geensins aan die veranderde behoeftes voldoen nie. Die kommissie wys ook op veranderings wat die afgelope vyf jaar aan die P.U. vir C.H.O. ingetree het.

„Wat studentegetalle en groei-koers betref word ons reeds onder die groot universiteite in Suid-Afrika gereken. Voorwaar 'n prestasie om op trots te wees. Tog moet ons ook bereid wees om die nadele en probleme wat hiermee gepaardgaan, die hoof te bied. Dit is in die lig hiervan wat die kommissie sy werksaamhede benader het”. Volgens mnr. Mulder is dit beter om voorkomend te beplan as wat 'n krisissituasie later opduik om 'n verouderde struktuur aan die kaak te stel.

ONDERVOORSITTER

In ons huidige struktuur is slegs die voorsitter nie gekoppel aan 'n hoofliggaam nie. Dit veroorsaak dat die ondervoorsitter, sekretaris en addisionele lid naas hulle dagbestedingswerk ook nog hoofliggaamswerk moet doen. Met die groter wordende getalle is dit steeds moeiliker om die dubbele las te dra. Die S.R. het daarop besluit om hierdie poste te ontkoppel van die hoofliggame. Die ondervoorsitter sal deur die massa gekies word terwyl die sekretaris en addisionele lid deur die nuwe S.R. uit eie geledere ge-

kies word. Hulle vakatures by die hoofliggame sal gevul word deur die volgende kandidate te laat opskuif.

NUWE HOOF-LIGGAAM

Die kommissie bevind ook dat verskeie komitees van die Studenteraad in die laaste tyd ontstaan het; hoofsaaklik liggame wat nie by een van die ses hoofliggame ingedeel kan word nie. Dit sluit liggame soos „Die Wapad”, werkvervaardingskomitee, reklamekomitee, Prompu ens. in. Hierdie liggame wat almal op diens ingestel is, word nou saamgevoeg om 'n nuwe hoofliggaam te vorm. Die hoofliggaam sal bekend staan as die A.D.B. (Algemene Diensbestuur) met ook verteenwoordigers op die Studenteraad. Studente wat massa-stemreg besit sal vir die A.D.B. se kandidate kan stem.

23 LEDE

As die A.D.B. se drie S.R.-verteenwoordigers bykom bestaan die S.R. uit 23 lede. Die kommissie bevind dat die getal te groot en lomp is. Die S.R. het daarop besluit om die verteenwoordigers per hoofliggaam van drie na twee te verminder. Die sewe hoof-★ Vervolg op bl. 5.

TWEEDEJAARSPROBLEEM?

DIE GAPING tussen die eerste- en tweedejaar is te groot en dié tussen die tweede- en derdejaar te klein, het 'n kommissie van die Studenteraad bevind. Die Rektor het die Studenteraad genader om aandag te gee aan die „tweedejaarsprobleem” en oorweging te skenk om die dra van knopies en die „meneer”-aanspreekvorm af te skaf.

Die tweedejaarsprobleem het ontstaan na aanleiding van verskeie ongerymdhede in die koshuise ten opsigte van eerstejaars waarby tweedejaars betrokke was. Die kommissie het bestaan uit die S.R.-voorsitter, Pieter Mulder, as konvenor, Eric van der Walt, Quintus Pelsier, Paul Kruger en Carel van Heerden.

VERSLAG

In die verslag wat aan die Rektor voorgelê is, beveel die kommissie aan dat hierdie probleem oorbrug word deurdat

Regsvereniging hou kongres

Die Regsvereniging van die Puk bied op 9 en 10 Augustus 'n regs-kongres aan vir alle regstudente in Suid-Afrika. Hierdie kongres sal onderwerpe behandel wat van akтуele belang is vir regstudente. Die unieke van hierdie kongres lê daarin dat al die lesings gelewer word deur studente self, een van elke kampus. Daar sal ook genoeg tyd wees vir bespreking van gemeenskaplike probleme. (daarmee word nie dosente bedoel nie.

daar na oriëntering 'n onderskeid gemaak sal word tussen tweedejaars en seniors, betreffende die aanspreekvorm. Tweedejaars sal op hul name aangespreek word, terwyl die „meneer”-aanspreekvorm vir seniors behoue bly, tot die huiskomitees besluit dat dit nie meer nodig is nie.

KNOPIES

Aangaande die dra van knopies het die kommissie bevind dat die maroen eerstejaarsknopie dien as erkenning en nie om die eerstejaar te verkleiner en as junior te tipeer nie. Gevolglik beveel hulle aan dat die dra van die knopies nie afgeskaf word nie.

Die kommissie beveel voorts aan, dat die tweedejaars as 'n duidelike groep geïdentifiseer word en tussen die seniors verdwyn, om dan as senior op te tree, ongeag sy posisie in die gesagstruktuur, nie. Die tweedejaar moet duidelik in teenwoordigheid van die hele koshuis op sy plek in die koshuis gewys word, synde nie meer 'n eerstejaar nie en ook nog nie 'n derdejaar nie.

STRAF

Daar moet steeds 'n mate van beheer en gesag oor hulle wees om hulle deur hierdie ongemaklike tussenstadium te help. Daar word dus aanbeveel dat tugkomitees in koshuise daarop gewys word dat hulle nie moet skroom om tweedejaars ook te straf nie. Uit 'n onderhoud met mnr.

Mulder blyk dit dat prof. Bingle die verslag goed ontvang het, en sy tevredenheid daarmee uitgespreek het.

Mnr. Mulder het verder verklaar, dat hy glo dat die verslag 'n stap in die regte rigting is, om die tweedejaarsprobleem die hoof te bied. Hy is vol vertroue dat daar in die toekoms minder klagtes in dié opsig na vore sal kom.



Hoe lank sal seniors nog hierdie voorreg geniet?

(Foto: Fotokuns.)

**Die Bult
Aptek / Pharmacy**

Noordbrug Aptek (Edms.) Bpk.

★ VIR AL U APTEKERBENODIGHEDE . . .
. . . ONS KEN U BEHOEFTE

Direkteure: Prof. M. C. B. v. R. v. Oudshoorn (L.A.V.)
Voorsitter; Dr. A. P. Goossens (L.A.V.); A. C. Dreyer
(B.Sc.-Far.) (L.A.V.) en Andries G. Coetsee (B.Sc.-Far.)
L.A.V. (Besturend).

Cine Puk
TOTIUSSAAL — P.U. VIR C.H.O.
'N KINEKOR-STER-MGM TEATER

VANDEESWEEK word ons teruggevoer na die stryd van die Franse in Algerië en spesifiek die verhaal van Lt-Kol Pierre Raspequy.

Hy het nadat hy sy valskerm-troep uit Dien Bien Phu gelei het, gevind dat hy sy pos verloor het, en hierna volg heelwat drama om dit weer terug te kry, waarby die Gravin

de Clairefons, weduwee van 'n Franse generaal, diep betrokke is vanweë haar invloed. Hier is nou 'n lekker spanningsverhaal om die aandag 'n bietjie af te lei van alles wat die tyd van die jaar greef, en om al die ou, weggesteekte avontuur van die Patryspeurder en Franse Vreemdelingelegioendae weer 'n bietjie af te stof!

In „Lost Command” sien ons Anthony Quin en Alain Delon saam met Claudia Cardinale, George Segal en Michele Morgan. Ek sien jou dus Vrydag-aand by die Totiussaal!



HALLO JY NUUSASTER

„A, NEE, A, kry 'n mens nie koffie in hierdie kamer nie?” Asseblief! Saterdagoggend 8.30 en sowaar, hier storm sy in op soek na 'n koppie koffie!

Altyd aan die gang, haar wasgoed klaar gewas, en blou van die koue is sy nou opsoek na koffie en 'n vinnige koeksessie.

Dis toe sommer net daar wat ek besluit dat ASTER 'n liggie op die primaria van Oosterhof, Annette v. d. Walt, moet werp.

Altyd op die voerpunt word sy onderhoofmeisie van die Hoërskool Vryburger in Germiston en behaal onderskeidings in Biologie en sowaar ook Duits.

Baie groen, maar nie heeltemal onbekend met die Puk en sy bedrywighede nie, stap sy as Doortjie in by Oosterhof. Die begin van 'n nuwe lewe.

Gou het Annette haar akademies vas gevat, en as jy vandag in kamer 231 in stap wonder jy of dit nie dalk 'n weef- of spinfabriek is nie. Met Huishoudkunde (O.K.) is sy altyd bedrywig met naaldwerk, spin en weef. (Sy voorspel dat sy eendag haar eie gordyne gaan spin en weef.)

Hierdie ASTER lees graag Konsaliek, hou van fliëk, veral een met 'n hartseer storie „Sodat ek lekker kan tjank,” sy waardeer alle soorte musiek, maar is nie juis 'n voorstaander van „underground musiek” nie.

Tipies van haar studierigting was sy verantwoordelik vir die skemerkelkies en ont-hale tydens Karnavaal '73, en die verwelkomingsdinee van die eerstejaars deur A. O. B. het ook op haar skouers gerus.

Aan samewerking het sy nog altyd geglo, en tydens Kuesta verlede jaar, het sy en Jan du Plessis van Toekoms so lekker saamgewerk, dat die „samehorigheidsgevoel” nog steeds

voortduur. „Annette, ons wonder of 'n onderwyseres haarself en 'n tokkelok sal kan onderhou?” . . . Sy lag skelm en ons wonder nog steeds.

'n Leidster op talle gebiede, wat op die Dameskomitee en op A.O.B. dien, en selfs verlede jaar vir die S.R. gestaan het, voel sy tog dat 'n dame op die S.R. op meriete daar moet kom. „Ons is genoeg ASTERS op die Puk, met genoeg potensiaal, waarom 'n verskanste pos skep?”

So het ons geskerts, oor die

toekoms, van pastorieë tot die harde werklikheid, die U.O.D.-toetse wat voorlê, 'n lekker-sleep-naweek, en toe die koffie op is en die koppie koud, Daar gaan sy

Annette onthou die foto by oom Piet, en onthou . . . Moe-nie vergeet . . .

'n Koelkop primaria, wat probeer om 160 Asters gelukkig te maak, en dit ook regkry, . . . maar moenie met haar sukkel nie, sy staan op haar regte en weet baie goed wat nodig en onnodig is.



TOPPUNT VAN FRUSTRASIE

'N FEES! 'n Harde dag agter die rug. Vanoggend met 'n skok wakker geskrik toe die aaklige wakker afgaan, en my terug

Oeee, alweer 'n toets, moes noodgedwonge opstaan, want „ek weet alweer steeds niks.”

Dankie tog dis verby, en sommer die dag se klasse ook. Nou gaan ek rustig verkeer . . . my kaste op my tyd regpak, wasgoed was, bad, en sommer-alles-wat-titteveer insluit, doen. Met die nuutste SARIE, die radio al spelende, en 'n koppie koffie rustig ontspan.

Ek weet dit was ook jou Donderdagmiddag idee, maar het jy ook soos ek tot die wrede ontnugtering gekom? Jou kaste reggepak, jyself is gereinig van kop tot tone, naels gepolitoer die lot, dan staan die wasgoed 'n berg hoog in die waskamer, en jou hande voete diep in die water: Die volgende gebeur:

„Juffrou So-en-So voordeur” en weer word jou naam herhaal! Die stryd „Sal ek of sal ek nie?” Ek is in my japon,

Dameskomitee aktief

„DAMES, en nou kom ons by die volgende agendapunt: ALGEMEEN. Is daar enige iets wat julle wil opper?” Die sekretaresse notuleer die volgende sake:

„Saterdagoggend behoort die koshuis eers 12.15 nm. te sluit, want ons kom nie betyds van die tweede sessie fliëk af nie, hoekom kan ons nie met pantofoffels gaan eet as dit in ons eie eetsaal is nie?, wat van algemene laataande tydens eksamentye?, en . . . en . . .” So vorder die klagtes, en dis nie net om sommer te ignoreer nie, want dit is sake wat ons ASTERS hinder.

Volgende dag draf die primaria en haar geleedere oor na die „Pa” toe. „Jammer hy is nie tuis nie, kom later weer.” 'n Redelike ernstige gesprek volg, en sy aandag word op die probleme gevestig, met die belofte dat hy sal kyk wat hy aan die sakie kan doen. Dit sal onder aandag van die koshuisadministrasie gebring word, en die probleme sal in ag geneem word by die opstel van die volgende koshuisreglement. „Dankie Professor, Tot-siens.” Ons wag, en die arme H.K. word met verwyte oë aangekyk.

Dit dames is maar net 'n kort uittreksel uit die lewe en bestaan van 'n dameskoshuis. Klagtes is daar altyd, sommige ongegrond en ander werklike probleme wat opgelos moet word, maar wat so baie maal in dood-loop-sstraat eindig a.g.v. al die kanale wat gevolg moet word.

Gelukkig vir die primaria en die H.K. hou alle klagtes en beskuldigings net daar op, want, Liewe ASTER, ons dames voel nie juis veel vir hulle eie Universiteit en selfbestaan nie. Gelukkig mag en wil hulle kla sonder dat daar gevra word, maar om iets self daar aan te doen — nooit sal hulle hul self tot iets so drasties verhef nie!

Dan kom daar vrae van ander kampusse se leiers . . . „Is daar sowaar nie iemand wat na julle dames se belange omsien en koördineer nie?” En ons almal beaam, niemand tree vir ons in die bresse nie, die S.R.-Manne maak alle besluite, ja hulle besluit oor ons

ASTERS se aangeleenthede.

Dis net daar wat ons AS, TERS die fout maak, niemand het gesê daar MAG nie 'n dame op ons S.R. wees nie, die dames is net te afgunstig op mekaar — daarom Kan daar nie 'n ASTER op die S.R. kom nie. Hoekom, sal sy nou 'n kruisie agter HAAR naam trek, nee wat, liever die man. Mis-kien dink julle dames is onbevoeg, maar as jy by die GROOT SWEET was, sal jy besef wat dit van 'n ASTER kos om haar sê te sê. As sy

nie werklik voel dat sy bekwaam genoeg is, met die nodige selfvertroue, en leierspotensiaal nie, sal sy dit nie waag nie.

Dames, dis tyd dat julle wakker skrik, ophou kla en meedoen. Los julle selfsug en gee HAAR 'n redelike kans, die eer, voorreg, en leierskap wat haar toekom, want GEEN dame is minder bekwaam as 'n man, veral as dit op haar eie lewensterrein is nie. Verkie-sing kom nader . . . Dus stem reg, Stem vir HAAR . . . !

STOP DIE TWIS

LIEWE PUK-MAN — Vandag wil ek graag namens die „silent majority” van die Puk-dames skryf.

Die groot bewering wat ek sommer in die begin wil maak, is dat ons almal siek en sat is vir hierdie hoërskoolagtige

tipe berigte wat of die Manne of die Asters afbreek. Ek dink ons het nou almal genoeg daarvan gehad.

Die volgende wat ek wil kwyt raak, is dat daar met die Puk-mans, en Puk-asters niks verkeerd is nie — soos op alle ander plekke in die samelewing is daar die goeies en die slegtes.

Sleep en alles wat daarmee saamgaan is iets wat spontaan ontstaan en ontwikkel en is telkens 'n persoonlike saak tussen twee mense alleen. Dus glo ek nie 'n mens gaan iets bereik deur nou skielik militante briewe in Die Wapad te plaas en te hoop 'n Ou of Aster gaan nou skielik skuldig voel oor sy of haar sleep-aksies nie. Ag nee wat, los die onderwerp nou asseblief uit en ek is seker die „onderlinge betrekkinge” op die Puk sal verbeter. Laastens, 'n woordjie aan julle Puk-Manne, ons Asters dink julle is heel „oraait”. PUK-ASTER.

Mooi lyk

BETEKEN elke Maandag ook vir jou die begin van 'n nuwe voorname?

Kamermaat, nee kyk, van vandag af ons lyk soos twee seekoë, man!

En dan? BULT TOE Pomelo's, provitas, verslank-kaas, en wat nog alles word gekoop. Vroeg opstaan vir oefeninge, dit help baie.

Min eet met onthyt, tel en loer na die kalorie-kaart, vanmiddag net vleis en slaai en so 'n bietjie tennis is net ideaal.

Water, en nogmaals water word gedrink om die honger-pyne te stil . . . maar maer word sal JY!

Vanaand eet ons weer 'n provita en dan: LATER DIE AAND:

„Dames hier is heerlike warm pasteie by die voordeur te koop.”

Julle kyk vir mekaar, en woordeloos word 20c uitgeruk. „Ag, dis so koud en ons het darem vandag baie hard gewerk!

Totsiens, Mooi Lyk . . . Ons begin maar Maandag weer hoor!

Verbeel jou

VERBEELE jou dat ek op hierdie groot planeet teen jou moes vasloop! Die skielike fladdering van vlindervlerke op my maag, laat my sonder asem. Die lug is blouer as ooi. Die blomkleure helderder as 'n paar uur gelede en die flou wintersonneltjie weerkaats meteens verblindend in jou oë.

Verbeel jou om te erken dat digters reg was in alles wat hulle geskryf het oor liefde en liefde met die eerste oogopslag.

Verbeel jou dat drome tog verwesenlik word. Om uit al die miljoene in die wêreld vandag — die één te ontdek. En dat dit met my moes gebeur! 'n Sinikus, so het ek gedag.

Skielik is ek vasgevang in 'n towerweb, gespin met ragfyn draadjies van die liefde. My hart sit koersagig aan die loop. Die ou „ek” verdwyn spoorloos. Net omdat ek 'n gesig gesien het.

Verbeel jou!

Aksies

DIE Dames-komitee is deesdae weer druk bedrywig met al hulle aksies. Is daar nog die gissings dat die komitee nie 'n bestaansreg het nie?

Nee wat, as ons so loer wat al aangebied is, en wat nog binne die volgende twee maande van die termyn aangebied gaan word, raak 'n mens sommer opstandig dat so baie Pukke die komitee as doodgebore aangeneem het.

Met dank kan melding gemaak word dat die ASTERS van Soetdorings nou ook toegelaat word om langbroekpakke te dra. 'n Fees waaroor die ASTERS baie gelukkig voel, ook dat hulle nie in die opsig afgeskeep word nie.

Kulu het verlede Saterdag 'n naaimasjien demonstrasie aangebied, in hulle sitkamer, en die Manne moet nou mooi-loop, ons gaan nou net klere maak vir 'n vale!

Vir die skoonheidsbewuste ASTER?, Kasteel bied Maandag 17 Junie om 7.30 nm. 'n skoonheidsdemonstrasie aan. Met die oog op die Lente en die nuwe grimeermodes word julle almal uitgenooi. Hou maar net die Dames-komitee se plakate dop vir verdere inligting.

Aan die Dames-komitee. Julle word vinnig groot, ons is trots op dit wat julle al aangebied het en wag in spanning op verdere resultate.

DIE SKOENSENTRUM

KERKSTRAAT 151
TEL. 3508.

Vir die beste modes in studente skoen-smake

DIE SKOENSENTRUM

UITSIG ARKADE.

DIE BULT.

—ST

KUNSTOER DEUR EUROPA

DIE kunsstudente en -dosente van Puk onderneem aan die einde van die jaar (vanaf 10 Desember tot 10 Januarie) 'n toer deur Europa.

Hulle besoek plekke wat nou verband hou met hul Kunsteskiedenisstudies. Daar sal egter terselfdertyd ook galerye besoek word wat die nuutste ontwikkelinge op Beeldende Kunste-gebied vertoon.

Die toer begin met 'n uitgebreide reis deur Italië wat onder andere Rome, Pompeije, Assisi, Ravenna, Venesië, Florence, Siena, Pisa en die marmerwerke by Carrara insluit. Daarna volg München waar onder meer die Olimpiese dorp besoek sal word en 'n operatuitvoering bygewoon sal word. Kersdag, met 'n heerlike Kersmaal word by die sprokieskasteel Neuschwanstein deurgebring.

In Nederland word die Delft-fabriek, Den Haag, Haarlem en Amsterdam besoek, terwyl toerlede 'n daguitstappie na Chartres en Versaille in Frankryk onderneem. Die Oujaar word afgesluit met 'n ka-

baret in die Lido!

In London word onder meer die wêreldbekende kunsmateriale-fabriek Winsor en Newton, besoek. Die toer loop in Spanje ten einde met 'n besoek aan Madrid en Toledo.

Hierdie is slegs enkele glanspunte uit die toer. Tyd word bespaar deurdat lang afstande per vliegtuig afgele word sodat toerlede heelwat geleentheid het om op hul eie ekstra museums en plekke te besoek. Vir dié doel is stadskaarte tot hul beskikking.

Hoewel die toer spesiaal vir die kunsstudente saamgestel is, word daar 'n aantal plekke vir ander kunstebelangstellendes oopgehou. Die toerprys is R780 en afbetaalfasiliteite word gereël. Belangstellendes kan mej. Adrienne Viljoen bedags by die Ontwerpkuns-ateljee agter die Puk-Pik of saans by tel. 4474 om meer besonderhede kontak.

ASB KRITIS LER NUSAS- STEUN VIR GEVANGENES

DIE ASB staan wel buite die aktiewe politiek, maar behou homself die reg voor om standpunte en maatreëls van die regering te kritiseer. Dit word egter verwelkom indien die regering binnelandse wet en orde en die reg van die blanke Suid-Afrikaner om ook self oor sy politieke toekoms te besluit, handhaaf.

In die huidige omstandighede mag persone en organisasies verskil oor die meriete van verbannings en wetgewing om sekere persone uit ons politieke arena te verwyder. Indien politieke gevangenis en verbanne persone op vreedsame konstitusionele weë van die regering verskil het, kan die ASB hom heelhartig in 'n veldtog vir die behoud van

hul vrye politieke opinie gewerp het.

Niemand in Suid-Afrika is tot op die hede egter ingeperk bloot omdat hy van die regering of die beleid van af-

sonderlike ontwikkeling verskil het nie. Onder sulke omstandighede sou die bestaan van die Progressiewe Party en 'n organisasie soos NUSAS verbied gewees het.

Dit is in die lig hiervan dat ons na vandeeweek se NUSAS-veldtog op die Engeltalige kampusse in ons land moet kyk. Die veldtog het as tema die slagspreuk: „Release all political prisoners.”

In die vroeëre persberigte word die afleiding gemaak dat hierdie veldtog verband hou met 'n veldtog van die Anti-
★ Vervolg op bl. 7 kol. 6.



Geleentheid om te toer

DIE ASB bied vanjaar twee toere na Europa aan. Albei vind gedurende Desember 1974/Januarie 1975 plaas.

Die een toer staan bekend as die ASB-kollegetoer en is korter as die ander toer. Die kollegetoer vind plaas van 13 Des. tot 4 Januarie en kos R769.00. Terme is beskikbaar teen R80.00 deposito en R20.00 per maand vanaf einde Januarie 1975.

Dié toer doen aan by die volgende lande: Engeland, Frankryk, Italië, Griekeland, Duitsland, Oostenryk, Nederland, Spanje, Portugal.

Baie voordele is by die toer ingesluit, soos goeie versekering, 'n gratis oornagtassie, twee etes per dag, BAIE goeie hotelle, 'n toerhandleiding en 'n ervare toerleier.

Verdere navraag kan gedoen word by Kobus van der Walt, Posbus 2495, Pretoria, 0001 of by ASB-hoofkantoor, Posbus 8711, Johannesburg, 2000.

LANGER ASB TOER
Dié toer vind plaas van 7 Des. 1974 tot 5 Jan. 1975. Die toerprys is R770.00 Terme is

ook beskikbaar. Dié toer sluit die volgende lande in: Engeland, Frankryk, Italië, Oostenryk, Duitsland, Switserland, België, Holland.

3 Etes per dag, 'n ervare toergids, goeie versekering van bagasie en persoonlike ongevalle, 'n oornagtassie en goeie hotelle.

Navraag vir dié toer kan gedoen word by ASB-hoofkantoor, Posbus 8711, Johannesburg 2000.

AMOREUS AKTUEEL

VANDAG sê ek weer: Hallo Maatjies, Hier is groot nuus; luister net — die toetsweek is verby en almal kry kans om uit hul „swot”-skuilplekke te kruip, die lewe gaan aan en dit is jou plig om tred te hou! Maar . . .

Linda Schönfeldt en Henk van Aswegen het sommer tussen al die leerwerk deur gekuier, terwyl Petro Joubert en Pit moet oppas vir deursleep. Haai, Linda Schonken en Ludwig, lekker sleep, ons geniet dit om julle so gelukkig te sien; en van akademie gepraat Bramie Kruger, het jy miskien iets daarmee te doen dat Gert Bredt se toetsuitslae so goed is?

(Terloops, moet tog net nie dat enige iets, veral akademie, jul sleepsale onderkry nie). Ons is nog jonk en daarom behoort ons hierdie geleentheid ten volle te benut.

Rika Meintjies word nou al „mooi groot,” veral as 'n mens

kyk na al die baie geskenkies, maar Henk dink dat sy méér mooi, as mooi groot is. Rich Verster en Isabel kuier ook letterlik hul dae om, terwyl Alba van Rensburg en Fanus Verster meer gespesialiseerd kuier, naamlik by die skoonfamilie!

Anita Moolman en Daan de Kock: (South West) birds of a feather, flock together, of hoe?

Piet Serfontein kuier ook so gereeld by Paula of kom hy saam met Dries Coetzer Karlien toe, want sien, Elsa Krüger bly mos daar. Mariaan Nel, ou liefde wil ook nie sommer roes nie, nè, en aan Hulda Heyns sê ons —

Nick bly ver, maar darem ook naby genoeg! Piet Eberzohn sleep nou al so erg dat mens dit in die Sentrale Eetsaal agterkom — vasbyt Piet!

Terwyl Annamarië Malan en Thinus geen bekendstelling in die eetsaal nodig het nie, want hulle sit gewoonlik saam en eet. Miskien moet meer maatjies hul voorbeeld volg.

Op hierdie hoë noot sluit ons af, en alhoewel die herfsblare val, lyk dit darem nie of dit herfs is in die amoreuse lewe op die Puk nie. — onthou net, wees soet, wees mooi, wees vrolik, want ons lewe, en om jonk te wees is om te lewe, julle maatjie!

STUDENTE OOR TOETSE

B. Juris III: Ek was onder die indruk dat ek 'n finale jaar B.Juris-student is, na die toetse besef ek ek is nou eers 'n derde jaar B.Juris-student.

B.A. I: Ek vind nou eers uit die toetsweek is nie maar nog net 'n reklamasie vir karnaval nie.

B.A. II: Ek gaan definitief my deposito verloor in die Staatsleer vraestel.

B.A. (Prop.) I: Aanvanklik het ek gedink ek het vyf verskillende vakke, nou besef ek alles is Grieks.

B.Sc. (Huishoudkunde) I: Is vitamies dan nie gogga-tjies wat in spinasie en kool voorkom nie?

B.A. III (Hisorories 6): My pa sal nie veel sê as ek uiteindelik vanjaar klaarmaak

nie-hy vermag dit al jare.

H.N.O.D. III: Ek sal ook beter vaar as my I.K. nie 10 was nie — 9 „gekrip” en een reg geraai.

B.Sc. II: Deesdae is daar vir ons ook 'n raaisel; Wat is wit en het 'n I.K. van 200? — 200 B.Sc. II studente.

B.Juris II: Blykbaar gaan ek volgende jaar aan met voorbereidende Latyn III.

FIETSRYERS TRAP FONDS LOS VIR SANRA

DIE ERNS van dwelmverslawing en alkoholisme en die bedreiging wat dit vir ons as Suid-Afrikaanse burgers inhou het ses van ons studente van die Potchefstroomse Universiteit aangegryp.

Ons het toe besluit om 'n landwyse veldtog asook 'n fiets-toer te reël om daardeur vir SANRA (Die Suid-Afrikaanse Nasionale Raad insake Alkoholisme en Afhanklikheid van Verdowingsmiddels) geld in te samel. Die veldtog het gedurende Mei 1973 'n aanvang geneem; die samewerking van al die stadsrade in die Republiek en Suidwes-Afrika was genader.

Gedurende November en Desember 1973 het ons ses studente 'n fietstoer van 2 200 km onderneem vanaf Pretoria oor Potchefstroom, Bloemfontein, Oos-Londen, Port Elizabeth tot in Somerset-Wes. Tydens die fietstoer is sewe stelle bande dwarsdeur gery; een fietsryer se ratkabel en traparm het gebreek; verder was daar min probleme met fietse. Die hitte en wind was baie uitputtend; 'n baie sterk Suid-ooster het veroorsaak dat die fietsryers 'n uur laat op Mosselbaai aangekom het; verder was hulle deurgans betyds en is hartlik verwelkom met verkeersbegeleiding op die meeste dorpe. SANRA organisasies op die verskillende dorpe het heelhartig saamgewerk en pragtige ondersteuning is verwerf.

Die veldtog het onlangs amptelik afgesluit en die mooi bedrag van R7 665.44 is ingesamel. Ons as studente is baie tevrede met die mooi samewerking van die stadsrade en die bevolking van Suid-Afrika wat die euwel van dwelmverslawing en alkoholisme terdeë besef; en wil hiermee elkeen wat mee gewerk het om die veldtog 'n sukses te maak, baie

hartlik bedank.

Opregte dank is aan mnr. Etienne F. Louw, Direkteur van SANRA verskuldig vir sy inspirasie aan die studente in hierdie projek wat hulle ten bate van die SANRA-fondse aangepak het. Alhoewel die finansiële mikpunt miskien nie heeltemal bereik is nie was die heel belangrikste die voortreflike gees waarin die saak van SANRA aan die publiek van Suid-Afrika bekendgestel is. Die publisiteit en goedgesindheid wat verkry is kan beslis nie in terme van geld gemeet word nie.

Verder is dit 'n skrikwekkende gedagte dat daar bereken word dat minstens 6% van

Suid-Afrika se blanke inwonertal wat alkohol gebruik potensiële alkoholiste is; hierbenevens is daar volgens deskundige getuienis 'n ontstellende toename van alkoholisme onder die Bantoe bevolking van ons land, veral in stedelike gebiede; die feit is dat dit ook veral die meer opgevoede deel van bevolkingsgroepe wat die leiers van more moet word swaar tref.

Indien hierdie toestand van sake u as leser aanspoor om verdere bydraes tot die bekamping van hierdie probleme te maak sal die studente dit waardeer as dit aan SANRA Posbus 10134, Johannesburg, gestuur kan word.

U het volop keuse in ons groot verskeidenheid

- HANDBOEKE
- SKRYFBEHOEFTE
- EN WAT U OOK AL VAN 'N BOEKHANDELAAR VERLANG

PRO REGE-PERS BEPEF

„Die Potchefstroomse Boekhandel”

TOMSTRAAT 86 — POTCHEFSTROOM

TEL. 5236

die WAPAD

NUWE STRUKTUUR

DIE Studenteraad het na rype ooreweging daarin geslaag om 'n nuwe struktuur vir die Studenteraad daar te stel.

In teorie lyk hierdie verandering na 'n meer vaartbelynde Studenteraad. Wat die praktyk gaan oplewer, is 'n ope vraag.

Op hierdie stadium kan geen negatiewe kritiek gelewer word nie. Die Algemene Diens Bestuur is 'n hoofliggaam wat baie moontlikhede het. Dit gaan die Studente-

raad se probleme in een opsig verlig en wel in die sin dat die probleme van, byvoorbeeld Die Wapad, eers goed deur die ADB deurtrap kan word. Al wat dan van die Studenteraad verwag word, is om die gesuiwerde produk van die probleem te bespreek.

Die Puk-massa wag groot-oog en groot-oor op die rigting wat die ADB gaan gee aan die studentebe-

TOTSIENS

DIE sekretaris van die ASB en ASPU, mnr. Sommie Morkel verlaat vandag die ASB.

Waar Die Wapad nou saamgewerk het met mnr. Morkel, vanweë ASPU, is dit vir ons moeilik om afskeid te neem van die klein ASB-snorkel.

Namens Die Wapad-redaksie en die hele Puk net die volgende: Dankie is 'n klein woordjie, maar 'n woordjie wat ons opreg bedoel en sê hoe ons voel.

Ons wens mnr. Morkel alle sterkte toe met sy nuwe betrekking.

KONFERENSIE VIR STAATMAKERS

DIE landsweye Staatmaker Konferensie is gedurende die langnaweek van 23-26 Mei 1974 gehou.

Hierdie konferensie is vanjaar gereël deur die Staatmakers van die Potchefstroomse Universiteit. Dit was die vyfde sodanige konferensie wat plaasgevind het in die Hoër-

seunskool Helpmekaar in Johannesburg.

Ten spyte van die petrol krisis was daar selfs ses verteenwoordigers van die Kaap.

Die tema van hierdie konferensie was Staatmaker-dinamika en daar was onder andere besprekings oor die Chris-

ten Afrikaner en Groepsdinamika. Hierdie onderwerpe is onderskeidelik ingeleel deur ds. Chris Jordaan en ds. Mike Smuts (jnr.), albei van Potchefstroom.

Daar is verder ook verskeie ander Staatmaker sake bespreek.

Hit die Woord

Kol. 3:12: „Beklee julle dan, as uitverkorenes van God, heiliges en geliefdes, met innerlike ontferming, goedertierenheid, nederigheid, sagmoedigheid, lankmoedigheid”.

ONS kry vandag te doen met baie mense wat sê dat ons van ons kant ook iets moet doen om ons saligheid te verwerf. Ons goeie werke verdien ons saligheid, so redeneer hulle. Maar hoekom moet ons dan goeie werke doen? Hoekom moet ons nederig, sagmoedig, lankmoedig wees as ons salig wil word?

Die nuwe mens is in Christus. Wat ons as gelowiges in Christus ontvang het, vind sy diepste oorsaak in die goddelike heilswerk jeens ons. As geheiligdes is ons deur God uitverkore, afgesonder. Die verkiesing gaan terug op die voorwêreldlike besluit van God ten opsigte van Christus. Ons kan ons dan verheug in dit wat God aan ons geskenk het.

Paulus skryf in die brief teen die dwaalleer wat daar in die stad Kolosse bestaan het, nl. dat ons nie

deur Christus se verdienste alleen gered kan word nie.

Volgens hulle moet die mens deur eie verdienste met die hulp van Jesus Christus self bo die sondige wêreld uitstyg. Hierteenoor stel Paulus die verlossingskrag van Jesus Christus duidelik. God se liefde is verkiesende liefde — God kies uit. Ons kies onself nie uit nie. Ons is deur God uitverkore.

Waar die selfkennis en erkenning van die liefde van God is, sal die nuwe mens openbaar word nie in hoogmoed nie maar in liefde en ontferming. Dan word die lewensopenbaring van die nuwe mens goedheid, vriendelikheid, ens. Omdat God ons eerste liefgehad het, omdat Hy ons uitverkies het, omdat Hy vir ons saligheid verwerf het, daarom wil ons ons lewens inrig na sy Woord uit dankbaarheid.

KORPS „NTWOORD „TWYFELAAR”

GEAGTE REDAKTEUR — „Twyfelaar” het in die vorige uitgawe van Die Wapad gereageer op 'n berig wat ek geskryf het oor die Korps se tagtigste verjaardag. Hy vra dat ek die volgende paragraaf in my artikel verduidelik, aangesien dit mag lyk of die kliekvorming voorstaan:

„Die spits van die ysberg het begin uitsteek toe op 'n vergadering van die Korps versoek is dat die „gereformeerde” uit die naam van die Korps verwyder moes word, omdat dit te veel van 'n „Dopper”-stigma in hom omdra. Hierdie aanslag op die naam van die Korps is suksesvol afgeweer en tesame daarmee ook 'n hele aantal mense wat andersins nog aan die aktiwiteite van die Korps sou deelneem en aktiwiteite sou bywoon.”

„Twyfelaar” sê dat die skrywer van bostaande nie baie duidelik is oor die verband wat hy wil lê tussen die eerste en laaste dele van die paragraaf nie. Ek het vir „twyfelaar” 'n verrassing — die hele paragraaf is 'n aanhaling uit 'n artikel van mnr. Lourens du Plessis, Korpsvoorsitter van 1970 en 1971. As gevolg van 'n drukfout in die Wapad kon dit miskien nie duidelik gewees het dat die hele stuk 'n aanhaling is nie (die aanhaling is nooit gesluit nie). Bedoel „Twyfelaar” nou dat ek onduidelik is of die oorspronklike skrywer van die paragraaf?

Indien u mnr. du Plessis om 'n verduideliking vra: Onthou dit gaan in die aanhaling oor die tyd toe mense gedink het dat die Korps 'n „dopper”vereniging was, wat natuurlik foutief was. Al lees 'n mens net die aangehaalde greep uit sy lang artikel, is dit duidelik dat hy oor hierdie stryd geskryf het. „Twyfelaar” maak nou die fout om iets oor „kliekvorming” in mnr. du Plessis se woorde te lees, wat onregmatig is. „Kliekvorming” is vandag miskien 'n strydpunt rondom die Korps, maar in die tyd waaroor mnr. du Plessis skryf (1960's) was dit nie die „issue” nie.

Wat wel destyds ter sake was, was dat die Korps deur mense misbruik is om posities in die studentelewe te bekom. Enigiemand kon byvoorbeeld staan vir Korps-Studenteraadslid. Dit was nie nodig dat hy eers op 'n Korpsbestuur moes gedien het vir kandidaatsvereistes nie. Hierdie mense sou graag wou sien dat die kwalifiserende „gereformeerde” uit die Korps se naam geskrap word, omdat die kwalifisering sommige van hulle tot nadeel gestrek het. Onthou: Destyds het jy 'n dopperstigma gedra as jy aan die Korps behoort! Ek reken dit is wat die aangehaalde skrywer bedoel waar hy sê dat tesame met die aanslag teen die Korps ook 'n hele aantal mense afgesweer is wat andersins nog aan die Korps sou deelneem en aktiwiteite sou bywoon. Natuurlik wil die Korps nie oppertuniste as leiers hê nie!

Indien „Twyfelaar” my van onduidelikheid beskuldig, omdat ek die stuk sonder veel verduideliking in my artikel aangehaal het: Dankie dat hy my daarop wys. Ek is net so gevoelig as hy dat dit skyn of daar geroem word op monologie deur 'n minderheidsgroep en wil nie dat die indruk bestaan dat die artikel juis dit bepleit het nie.

Daar is twee soorte klieke:

Die soort wat eksklusief andere uitsluit en dié soort wat inklusief andere welkom wil laat voel by die kring. Eersgenoemde soort verpes ek omdat dit sieklike kliekvorming is, waar 'n mens altyd as buitestaander onwelkom voel. Maar die tweede soort „klikek” is aanloklik — ek voel welkom om my by hulle in te trek. Hulle laat my nie verstaan dat ek „nie een van hulle” is nie.

Die Korps kan 'n „klikek” wees in die goeie sin van die woord — dis immers wat meeste verenigings is soos die K.J.V., J.V., Volkspole, Florna

ens. ens. 'n Mate van groepsgebondenheid is noodwendig by enige vereniging. Omdat „klikek” 'n negatiewe konnotasie het, praat ons egter in die sin gewoonlik nie van 'n klikek nie.

Wat die praktyk betref vertoon die Korps 'n openheid: Selvergaderings is vir alle Koshuisinwoners, nie net vir Korpslede nie. Programvergaderings word vir alle Pukke aangebied. Die eerstejaarskamp, '77-Aktueel, reël die Korps vir alle belangstellende eerstejaars, nie net vir 'n groepie geselekteerdes nie! Paul Krüger.

Stofwolke draai oor berig van Reflektor

MENEER, Ek vra my die vraag af: Wat is die doel van Reflektor? Is dit nie 'n rubriek wat handel oor aktuele sake op die kampus rakende die studente van die P.U. vir C.H.O. nie?

Nou wil dit vir my voorkom of dit nou aan enigeen gebied word om sy, of liever in hierdie geval, haar, griewe teen die samelewing te lug.

Nou aan die tannie wat Reflektor behartig het in Die Wapad van 31 Mei 1974. Dink jy nie jou eensydige kleingeestige geskryfde sou beter gepas het in die deel van ons koerant aan julle dames afgestaan nie?

Jou werklik waar onthou jy jou toe nie van die woord „gevrek” nie. Lyk my nie jy het genoeg moeite gedoen nie.

Dit lyk my jy is een van die min dames wat weet wat in die mans se kamers aangaan en ook in die Elgro.

Wat 'n vergadering soos 'n massavergadering moet wees, weet ons almal. Dis nie nodig

dat jy jou daarvoor uitlaat nie.

Jy praat van allerlei dinge wat reeds ou bekendes is. Hoe jy met jou wye insig in die manne van die PUK kan dink dat sulke kritiek ons kan skroei, laat my stom.

Aag tannie, asseblief man, om Reflektor te gebruik om jou minderwaardige geslag op te hemel, is net nie hoe dit gedoen word nie. Indien jy ooit weer so 'n kans kry, probeer aktueel wees, raak wees, nuut wees en bowenal my liewe ou meisietjie, moet nie gevrek wees nie.

Manne, was al ooit soveel snert deur so min gebesig. Net dit, aanvaar dit as afkomstig van 'n wordende lid van die vroulike geslag. Ben du Toit.

WAPAD-REDAKSIE

Hoofredakteur: Tjep van Schaik.
Assistent-hoofredakteur: Piet Ebersöhn.
Nuusredakteur: J. H. Habig (Thaba Jah).
Assistent: Jan van Niekerk (Dorp).
Redaktrise Sosiaal: Willemien Jerling (Klawerhof).
Assistent: Salome Jacobs (Dorp).
Redakteur Koshuise: Cobus Erasmus (Skuur).
Assistent: Dalene Delpoort (Vergeet-my-nie).
Redakteur Akademies: Johan Pretorius (Skuur).
Assistent: Esme Wessels (Karlien).
Redaktrise Kunsblad: Salome Jacobs.
Redakteur Sport: Izak Malherbe (Liberalia).
Assistente: P. J. Meyer (Uitspan); A. F. Vosloo (Skuur).
Redaktrise Damesblad: Salome Brits (Oosterhof).
Redakteur Inter-Universitêr: Danie de Kock (Dorp).
Redakteur P.N.B.: Quintus Pelsler (Over de Voor).
Redaktrise Korps: Ineke Lindhout (Klawerhof).
Redakteur A.B.K.K.: George Lotter (Dorp).
Redakteur S.A.B.: Japie Robbertse (Over de Voor).
Fotoredakteur: J. F. D. Croeser (Uitspan).
Assistent: Sam Basch (Liberalia).
Sub-Redakteur: Attie Gerber (Liberalia).
Sekretaresse: Cecilia Louw (Wanda).
Sirkulasiebestuurder: Izak van der Linde (Over de Voor).

IS 'N STRUKTUUR AANPASSING VAN DIE S.R. 'N OPLOSSING?

'N SEWENDE HOOFLIGGAAM, die Algemene Diensbestuur (ADB) is in die lewe geroep. Hierdeur word 'n aantal studenteliggame saamgegroepeer, wat voorheen organisatories op 'n taamlike losse basis gefunksioneer het. So 'n herrangskikking was nodig, gesien teen die agtergrond van die baie verenigings, klubs en komitees op die kampus. As jou aantal studenteliggame vermeerder, moet jou struktuur soepel genoeg bly om dit te akkommodeer. Die sewende hoofliggaam bied egter net 'n gedeeltelike oplossing. Dit maak bloot voorsiening vir die groter aantal verenigings, klubs en komitees en hoe dié liggame se besture onderling skakel. Dit maak nie voorsiening vir die groter aantal studente nie, wat in 10 jaar van 2 200 tot 6 600 gepaddestoel het en die aantal koshuise wat van 9 tot 20 vermeerder het. Al is die studenteliggame geskommel in 1967, 1971 en nou weer, bly die basiese uitgangspunt gesentraliseerde aksies. Om 6 600 studente by één aksie betrokke te laat voel, sonder om by klein groepies te begin, is wensdenkery.

DRUKGROEPE

As die hoofliggame te veel op gesentraliseerde basis werk, is die gevaar van drukgroepe, wat die hoofliggame oorneem, baie groot. Daar is een hoofliggaam wat die naam dra dat hy deur 'n groot koshuis anderkant die spoor beheer word en 'n ander hoofliggaam

het weer die reputasie dat hy deur 'n groep koshuise duskant die spoor beheer word. As ons na die twee hoofliggame se besture kyk, kan ons nie help om saam te stem nie. Groot getalle maak dit moontlik dat een groep op die kampus weens die algemene onbetroubaarheid, hulle kan inwurm in een hoofliggaam.

kunste en KVV syne vir korp-saksies. Dit sal voorkom dat die koshuise een wêreld is en die studentelewe 'n ander wêreld, beheer deur 'n paar ingewydes.

Die tyd van blote plakkaat-reklame is uitgedien. Elke hoofliggaam moet deur middel van sy man in die koshuis vin-nig en effektief 'n aksie kan loods, mense kan organiseer. Die suksesvolle Karnavalle van '73 en '74 het bewys hoe goed aksies werk op koshuisebasis aangebied en op koshuisebasis

gereklameer.

INTERKOSHUISKOMITEES?

Sommige hoofliggame probeer die probleem ondervang deur hulle sogenaamde inter-koshuiskomitees. Die beswaar teen 'n interkoshuiskomitee is dat dit bloot 'n oorlegkomitee bly. Daarna besluit die hoofliggaam se hoofbestuur en die interkoshuiskomitee moet die vuil werk in die koshuis gaan doen. Hoekom kan die koshuis-man nie help om die besluite

te neem wat hy in sy koshuise uitvoer moet bring nie? Hoekom kan hy nie sêlf op AOB, ADB en ABKK sitting hê nie?

HOE GEMAAK?

By alle hoofliggame, buite SAB en SSB, is 'n konsekwente deurvoering van desentralisasie moontlik. Dit is geen verwatring van die Puk se unieke stelsel van belangebhartiging nie, maar sorg bloot dat al die studente se belange

tot hul reg kom in die verskillende geografiese eenhede op die kampus.

PNB, en KVV het met sy selle, die pas aangegee. Na wat verneem word gaan AOB hulle hierin volg. Met die huidige skommelings en opstel van Grondwette en Reglemente is dit 'n ideale tyd om desentralisasie kragtig deur te voer.

Terug koshuise toe! Laat die koshuise die hartklop van ons studentelewe wees!

Paul Krüger.

DESENTRALISASIE

Die ADB is 'n welkome sewende skaar aan ons sesskaarploeg. Wat egter nodig is, is 'n moderne skottelploeg.

'n Meer ingrypende struktuurverandering in ons studentelewe is nodig — in die vorm van desentralisasie koshuise toe. Die slagspreuk moet wees: Laat ons koshuise weer lewe! Laat elk van die hoofliggame sy man in die koshuis hê — AOB syne vir ontspanning, ABKK sy man vir die

teenwoordigster ondersoek. As gevolg van verskeie probleme kon die kommissie nie uitsluit-sel oor die saak verkry nie. Daar is toe aanbeveel dat die saak hierdie of die volgende termyn weer ondersoek moet word.

Naas die dagbestuur het ook mnre. Paul Krüger, Marius Schalekamp, Carel van Heerden, Jan Henning en mej. Ineke Lindhout op die kommissie gediën.



PAUL KRUGER

Nuwe struktuur...

★ Vervolg van bl. 1. liggame sal dus veertien verteenwoordigers hê. Die vyf dagbestuurslede word dan bygevoeg om 'n totaal van 19 te vorm.

Die kommissie het ook die moontlikheid van 'n damesver-

Een manier om vooruit te kom is om die regte mense te ken.

Ontmoet ons man by die Pukke: Wikus Pretorius

Nedbank is in u midde om u in u geldsake by te staan, met 'n volle reeks bankdienste wat spesiaal vir studente se behoeftes beplan is. Die Nedbankers bied u: Studenteleninge van tot R500 per-jaar van u tweede jaar af en, ná afstudering, ook lenings vir jong beroepslui. Studente-kitskontant-rekeninge wat rente op 'n daaglikse saldo lewer — sonder enige grootboekgelde.



Gratis eksemplare van Nedbank se „Passport to Pleasure” en die ekonomiese maand- en kwartaalspieël-beelde. Vra net om op ons poslys geplaas te word. Vir inligting oor al hierdie dienste, en vir spoedige beslissings, gaan gesels met Wikus Pretorius by Nedbank, Kerkstraat 141, Tel. 4394.

NEDBANK
'n Lid van die Nedswel-groep

Die Nedbankers

Ten volle deure Suid-Afrikaners besit en bestuur.

Quadrant 3129

DIE NES BUILEWE SENTRUM

—★—★—

Alle toerusting vir buite-lewe entoesiaste. Ons verskaf alle kampeertoerusting, asook

JURGENS EN VENTER
WOONWAENS
EN SLEEPWAENS.

—★—★—

Flornalede:

ONS IS BEREID OM U SPESIFIEKE TOERUS-
TING OP BESTELLING TE KRY!

—★—★—

Wolmaransstraat 40,
Telefoon 7328,
POTCHEFSTROOM.

—ST

SAB wapad

DIE VERLOWING

deur Kerneels van Niekerk, Finale LL.B.-student.

WANNEER IS JY VERLOOF? Partye kan verloof raak met of sonder verloofring, skriftelik of mondeliks, uitdruklik of stilswyend, persoonlik of deur middel van 'n derde. In die Romeinse Reg was 'n verlowingskontrak nie afdwingbaar nie en geen skade kon verhaal word nie. In ons reg kan 'n man en 'n meisie mekaar aanspreeklik hou by die verbreking van 'n verlowingskontrak.

DIE VERLOWINGSKONTRAK 'n Getroude man of vrou kan nie met 'n ander persoon 'n verlowingskontrak sluit nie. Selfs nie 'n voorwaardelike verlowing soos „indien ek 'n egskeiding verkry" is geldig nie. So 'n kontrak is nietig. Buiten hierdie geval kan 'n verlowing voorwaardelik geskied, bv. „as ek verkies word tot Alabama". Die voorwaarde moet egter nie teen die goeie sedes wees nie.

Waar 'n party 'n wesenlike fout begaan bv. die identiteit van die ander, sal die verlowing nietig wees. Waar 'n party dwaal ten opsigte van iets soos die finansiële posisie van die ander sal die verlowing nie nietig wees nie. 'n Dwaling ten opsigte van die geelof van die ander sal die verlowing egter nietig maak.

As na die verlowing vasgestel word dat een van die partye 'n onkuise lewe gevoer het voor verlowing, sal die kontrak vernietigbaar wees. Onkuise gedrag met 'n ander na sluiting van die verlowing sal 'n geldige grond vir die opsegging van die verlowing wees. Ook sal 'n meisie die verlowing kan opseë indien die man poog om haar te defloreer.

EISE VIR

SKADEVERGOEDING

Skadevergoeding kan deur die onskuldige party ge-eis word as:

1. Die verlowing sonder goeie rede opgesê word, of
2. As deur laakbare gedrag die onskuldige gedwing word om terug te tree uit die kontrak.

Ons howe is meer geneig om substansiële skade aan die meisie toe te ken as aan die man. Daar kan ge-eis word vir genoegdoening (hariseer, leiding, ens.) en skadevergoeding (finansiële verliese gely en

voordele wat die voorgename huwelik kon bring).

Faktore wat in berekening gebring sal word by die vaststelling van die bedrag geld is onder andere: Die sosiale stand van die partye, die mate waarin die eisers se gevoelens gekwets is en die laakbaarheid van die verbreker se optrede.

Waar die man die meisie ook gedefloreer het met belofte van 'n huwelik, sal sy ook vir deflorasie kan eis.

VERLOWINGSGESKENKE

As die man die verlowing verbreek sal die meisie die verloofring kan hou aangesien dit geskenk is met die oog daarop
★ Vervolg op bl. 7.



Osie (links), en Kerneels van Niekerk, wat verantwoordelik is vir sommige van die bydraes op hierdie bladsy.

(Foto's: Fotokuns.)

Gesinsbeplanning

DIE PIL IS GRATIS BESKIKBAAR! Hierdie aankondiging deur die Minister van Gesondheid, dr Schalk van der Merwe, op 15 November 1973 het groot kritiek uitgelok. Voorlopig geld die instelling net vir Pretoria en Bellville-omgewing, maar die projek word glo verder uitgebrei.

Hierdie aankondiging is egter geen rede vir 'n ander groep om breed te glimlag nie! Die hele skema staan onder streng beheer.

'n Besluit deur die kabinet bepaal dat 'n vrou wat 'n kliniek besoek en kwalifiseer, 'n identifikasiekaart sal ontvang wat die besonderhede van haar voorskrif sal bevat en 'n aan-

tal koepons wat haar in staat sal stel om 'n gratis voorraad van „Die pil" te behou. Die vrou staan egter nog onder verpligting om gereeld die kliniek te besoek vir roetine-ondersoeke.

Die voorbehoedmiddels sal slegs vanaf sekere apteke verkry word. 'n Plakaat sal aandui dat die apteek aan die gesinsbeplanningskema deelneem. Deelnemende aptekers word deur die Sekretaris van Gesondheid vrygestel van die „Wet op Moonlike Nadelige middels".

'n Klinese pak wat vyf spesifieke tipe voorbehoedpille bevat sal deur die apteek ontvang word en slegs dié spesifieke tipe sal aan die kwalifiserende vrou voorsien word. Die vrou sal 'n kaart hê waar die voorgeskrewe aantal tablette aangedui word en wat deur die apteeker se stempel gekanselleer word ná voorsiening om sodoen korrupsie uit te skakel.

Die nuwe skema verander dus geensins aan enige kontrole oor voorbehoedmiddels nie maar stel 'n sisteem daar wat nuttiger beplanning veral onder die minder gegoede, aanwakker.

Erkenning aan; S.A. Tydskrif vir Apteekwese.

Osie van Niekerk.

Is Suid-Afrika bestand teen resessie?

deur Riaan van der Walt, Ekonomiese Vereniging.

MET DIE STYGING van pryse waarvan ons gedurig hoor en 'n inflasiekoers van ongeveer 16 persent, kom die vraag onwillekeurig by 'n mens op: „Is Suid-Afrika bestand teen 'n resessie?"

Ons sien dat die wêreld se rykste lande besig is om 'n depressiegraf te grawe wat vir die ontwikkelende lande op hongersnood kan uitloop. Suid-Afrika is in 'n mate verskans teen die meeste ryk lande se poging om hul eie bus te red. Toe olie in Januarie weer vryelik begin vloei het, is daar gevrees vir 'n insinking in die wêreld ekonomie. Maar al wat gebeur het, is dat die gevaar van resessie weens voorsieningstekorte afgeweer is.

Tog lyk 'n resessie nou nader omdat mense eenvoudig weer om teen steeds stygende pryse te koop. Die gebrek aan vraag sal 'n tyd lank verbloem word deur die opbou van voorrade wat in die begin van die jaar totaal uitgeput is.

Die ekonomiese beleid in al die ryk lande sal bepaal word deur hul inflasiekoers, groei-koers in vraag na arbeid, betalingsbalans en die beheer-maatreëls wat ingestel gaan

word. Geeneen van hulle het tot dusver verbruikersvraag aangemoedig deur die verlaging van onregstreekse belasting om die nadelige uitwerking van die olieprys vas te vat nie. Die meeste het eenvoudig pryse laat styg en die vraag laat afneem.

Mnr. Dennis Healy, Minister van Finansies in Brittanje, se waarskuwing, dat geen land kan leef met 'n inflasiekoers van meer as 20% nie, is bewys. 'n Middel om die probleem te stuit moes gevind word.

Gelukkig is S.A. in 'n groot mate hierteen ver skans. So lank die goudpryse hoog bly, sal die invloed van buitelandse kapitaal en goeie pryse vir ons grondstowwe, ons sterk.

Ons het steeds ons eie probleme met ons betalingsbalans. Daarom het die regering vroegtijdig wal gegooi teen die invoer van ander lande se infla-

sieprobleme. Die hoër rentekoerse sal die vraag na duur invoergoedere bekamp en terseldertyd meer buitelandse geld kan leen, die invloed van buitelandse geld al is dit teen hoë koste, sterk aanmoedig.

Geeneen van die ryk nywerheidslande gaan toelaat dat ander arme en ontwikkelende lande met groot grondstofvoorrade hul afpers soos die Arabiere dit gedoen het nie. Hulle is steeds besig om die handelsvloei in hul guns te swaai en tot nadeel van die ontwikkelde lande.

Dit is veral die ontwikkelende lande waar verwerking van grondstof nog nie plaasvind nie wat deur die ryk lande se uitvoeroorlog geraak sal word. Die 2000 miljoen armes in Afrika, suid-Amerika en Asië sal min kans hê om terug te slaan.

Dit is teen die inflasiegedrog, maar hoe lank sal ons dit nog kan uithou?

P.A.S.V. GEE RAAD

NOUKEURIGE en diepgaande navorsing deur 'n ondersoekspan van die Potchefstroomse Aptekerstudentevereniging het die volgende oplossings vir 'n aantal ernstige probleme aan die lig gebring.

DOOFHEID

- Gooi waterskilpadvet in die oor wat doof is.
- Sny 'n haas oop druk water uit blaas in 'n flessie en gooi in oor of steek pluisie nat in oor. Vlakhaaswater is die beste.
- As 'n mens somtyds doof word kan jy 'n paar kafferhaar krulletjies daarin steek en die doofheid sal weggaan.

UITTREK VAN 'N DORING

- 'n Perdevlieg word lewendig gebruik om turksvydorings uit te trek.
- Sny 'n rosyntjie oop en haal pitte uit, sit 'n vlieg daarin en maak oor plek vas.

TEEN BLOEDVERGIFTING

- Sit 'n pap van beesmis en asyn op, nadat die mis opgewarm is, (warm beesmis van die kraal is die allerbeste.)
- Hou die seerplek in warm wassodawater en sit dan 'n Merinoskaap se niervet gebrui saam met 'n bossie (ons noem dit teebossie omdat die naturelle daarvan tee maak) daarop. Dit word gekook tot dié soos 'n groen salf lyk. Daar is nie 'n seer wat hierdie mengsel nie gesond sal maak nie.

TEEN BLOEDVINTE

- Wasluise wat op vet doring-

bome sit word geneem en gebrei tot 'n pleister, dit is goed om bloedvinte ryp te maak of dorings uit te trek.

TEEN LAE BLOEDDRUK

- Hierdie siekte ontstaan deur uitgeputte senuwees. Hier is baie rus nodig en versterkende voedsel nodig. Neem vroeg in die more 1 teelepel koeksoda in 'n glas baie warm water. Elke keer soos u skielik snaaks voel en wurg, neem weer die koeksoda water. Hou so aan totdat dit verdwyn. Kamfer brandewyn met water help ook. Neem dit saam as u lewers heen gaan. Dit is altyd gereed.

TEEN GIFTIGE BYTWONDE

- Skerpion in soetle gestee en opgesit.
- Maak 'n xxx Peppermint effens klam en sit op die plek. Hou op tot die gif uit is. Dit vreet 'n gat deur die peppermint.

VIR SLANGBYT

- Drink haanharsings met wyn.
- Neem onmiddellik na 'n slangbyt 'n lewendige hoender en sny dit 'n klein snytjie voor die bors, druk dan die snytjie teen die bytplek. Hou dit so vas totdat die hoender dood is. Neem dan die dooie hoender weg en

herhaal dit met 'n ander een. Hou so aan totdat die hoender nie meer sterf nie — wat meestal met die agste of tiende hoender die geval is. Gee intussen die gebyte persoon so veel soet melk in as wat hy kan drink.

Florna gaan mal

FLORNA het onlangs 'n baie geslaagde toer onderneem na Mtunzini, 'n gebied onder beheer van die Natalse Parkeeraad. Die toergroep van 58 lede het feitlik al die koshuise verteenwoordig. Die toer was 'n groot brul en die gees onverbeterlik. Daarom kan u gerus die Wapad en die kennisgewingborde dophou vir die volgende toer — dit is die moeite werd.

A.S.B.-kongres

Alle persone wat belangstel om die kongres as waarnemers by te woon moet hulle name by die S.R.-kantoor gaan opgee.

KOOP-'N-LOOP-HAPPIE

AL ONS HEERLIKE HAPPIES NOU

NADER AAN DIE PUK.

Sien jou by die ou

FLAMINGO

PADKAFEE

LIBERALIA

VANAGTER golwende graanlande en bloeiende blomme, (ideaal vir kransies), net die paar, al roggelende en stotterende afskeidswoorde . . . Die simptome van die gevreesde siekte was telkens die laaste paar weke in ons spyskaart te bespeur; Natuurlik, MAALVLEIS A' LA VARIASIE.

Met die tydverkwistende en sosialistremende akademiese stryd so byna agter die rug, het daar tog groot dinge so tussendeur in ons graanskuur plaasgevind. Ons twee Tokkelokke Ernst en Klaas wil ons graag felisiteer met hul verlowings; Maar nou wonder mens wie gaan die volgende wees, dalk Isak? Dan wil ons ook vir Attie gelukwens met sy nuwe sweetpak, maar ai, noudat ons almal weet jy het sulke „klasieke" tone, wat van 'n nuwe paar skoene?

Juis noudat ons manne se kapsels begin verstewig teen die winterkoue en onvoorsiene faktore soos Toetsweek-toestande vir B.B. in die son, het die huispa se hondjie die nare gewoonte om sy verskyning op baie ongeleë tye in ons teenwoordigheid te maak, tot groot vrese vir sommige van ons manne. Maar soos dit maar altyd gaan, gaan dit ook nie hier om die hondjie nie, maar om die volgende halsbandjie.

Vir ons „Lead Gitarist," Dirk, somer 'n groot hand met sy insluiting in Alabama: Nou gaan ons somer „hoog" raak van die musiek. So ook vir Kobus met sy insluiting in die Gimnastiek-span wat die komende vakansie in Rhode-sië gaan toer.

Met ons rugby gaan dit somer voor die wind; blykbaar het die Sportinstituut nou besluit om ons manne permanente PUK III status te gee . . . veral as daar van die mededingende koshuisspanne se manne op die krukkelys is. !

KULU

WAS weer naweek, was weer „afvattyd" oppie plaas.

Vrydag het die „vaal drukende Mis" wat die afgelope week oor Kulu hang, gaan lê. Die Proffies het gelukkig besluit om vir twee volle dae asem te skep alvorens hulle die meedoënlose kruisvrae en blokkiesraaisels weer gaan hervat.

Met stowwerige fronsgesig-gies is die koshuis dan ook die middag begroet en teenoor verskeie dosente is heelwat alleensprake gevoer. Vrydagaand is alles egter vergete en is die interkom warm gepraat. (Deesdae doen net marathonaatlete hier diens).

Saterdagoggend is Oosterhof gou-gou gewys dat ons hulle gelyke is op die hokkieveld en daarna het 'n Pfaffnaaimasjien demonstrasie menige aster na Pappa Oppenheimer laat verlang.

Saterdagmiddag het Karen deur middel van rolskaatse die stoep blinkgepoets — net jammer dat Louise dikwels saamgenooi is grond toe.

Met die vasslepers gaan dit voor die wind — selfs met die „bondel-slepers". Onwillekeurig dink ons aan Marietjie en 'n sekere aster wie se sleep in Pretoria tweedeviool speel.

Riëtte behoort aan die Britse Geheime Diens en geniet die nuuskierigheid terdeë.

Maar helaas aan alles is daar 'n einde en vir nog 'n week is „Raai-raai-riepa" aan die orde van die dag, die Proffies onder „toespreking" en die vraestelle buite bespreking.

Daarom sê ek gou-gou: „Fahren Sie Wohl!?"

KLOOSTER

NA 'n week of wat, net toe die publiek begin hoop het die Pukkewyne het almal oorse gevlieg om eers na die winter weer terug te kom, is die eksamen verby en kruip almal weer uit hulle skuilgate uit. En Johan van Niekerk het onder sy Anglia uitgekruip. Ons wens hom geluk met sy hernude staat van mobiliteit.

Die rede is onbekend, maar berig is ontvang dat Koo Saayman aansoek om 'n betrekking by SAUK gedoen het. Sodra hy van hulle hoor, sal hy kursus opskop. Terloops, Klooster het nou 'n interkom gekry. Tussen hakies, Jan Jacobs is besig met 'n eetsteking. Rede ook onbekend.

Klooster het ook nou sy eie vermaaklikheidsgroep gekry. Staan glo bekend as Thalia.

Ons weet nie hoekom nie, maar ons huisma wil nou na Engeland emigreer en by die Royal Guard aansluit. So van die huisma gepraat, daar is nou glo reëlings dat huismoeders na etes die „priso-

Vergeet-my-nie het 'n unieke „hennedinee" gehou. Die dinee was slegs vir dames en elke dame het 'n dorp voorgestel. Daar was die oorspronklikste idees — bv. een het Ogies voorgestel en 'n ander Jan Kempdorp, met natuurlik 'n slang om die nek! Reg, Elmien en René?

Die prys vir die oorspronklikste is oorhandig aan Engels wat Carletonville voorgestel het. Sy was toegedraai in Carlton „hm" papier soos u op die foto kan sien. Ons sien uit na 'n volgende aksie wat ons almal saam kan geniet. Groetnis.

SKUUR


DIE gerug doen deesdae die rondte dat versoeke vir die manne op die grens ook die Skuurmanne insluit — die manne op die grens van die kampus. Dit het ons egter nie verhoed om weereens met Klooster se eerstepan klaar te speel nie 14 — 3. Eweens het die tweedepan sy posisie nog verder verstewig deur Dawie-Dup se Tweedes te klop 16 — 0. Die manne keil egter nie net ander koshuise op

Die wenner van die Henneparty ontvang haar prys op Vergeet-my-nie se interessante en oorspronklike dinee. Sy het Carletonville voorgestel deur „Carltonpapier" om haar te draai . . . (Carletonville is natuurlik die dorp met die baie „sinkgate" — Red.)

nie, maar ook onder mekaar word gespook. Skewe Sewe slaag daarin om Voëlvlei te klop in 'n spannende sokkerwedstryd. Baie geluk en voorspoed met jul verdere botsings. In dié stryd is Skewe Sewe se eie „Vrou" se afwesigheid swaar gevoel.

Baie geluk ook aan die Skuurmanne wie se uitstap na Buffelspoort die Wapad gehaal het. (Ons is net bly dat julle nie 'n vangwa gehaal het nie.) Dankie aan die Landloopspan oor hul eerlike beriggewing oor die „intertee".

Tannie „Rubberhamer" kla gereeld oor die wasbakproppe wat verdwyn. Ons kan haar egter verseker dat dit alles teruggespoel word in die kos — tensy vleis deesdae kettings aan het en na rubber smaak.



DORP

DIE dorp se hempies triomfeer nog in die groenheid van hul erfenis: steeds die grootste huis op die Puk, die vinnigste trapkar, die mooiste meisies, die sterkste rugby-

spanne. Geluk eerstepan met jul oorwinning teen die sterk Biouspan van Over de Voor. Dit was skitterend!

Die dorp wil ook so trots op hul eerstejaars wees. Julie moet asseblief die kollektelyste en Pukkiegelde kom ingee en ook knopies kom kry tussen een en twee by die S.R.-kantoor.

Ons hoop die groen velde strek ook ten opsigte van die akademie en dat ons na dese weer meer glimlaggende dorpenaars teë sal kom.

Daar is hoop om in die toekoms 'n vergaderplek te kry — waar 'n teëkan sal wees om meer samehorigheid te bewerkstellig.

★ Vervolg van bl. 3.

Apartheid Movement, die African National Congress, Suid-Afrikaanse Kommunistiese Party in Londen en ander buitelandse groepe met dieselfde tema. NUSAS-woordvoerders ontken dat so 'n verband bestaan. Nogtans kan daar nie argeloos afgestap word van 'n ondersoek hierna nie. Die ooreenkomste ten opsigte van die tyd en inhoud van die veldtogte regverdig dit. Dit sal 'n kwade dag wees indien NUSAS daaraan skuldig bevind word dat hy met hierdie vyande van die Republiek heul.

Volgens verdere berigte herinner die polisie daaraan dat van die politieke gevangenes na ernstige oortredings kragtens die Wet op die Onderdrukking van Kommuniste en die Wette op Sabotage en Terrorisme gevonnissen is. Dit, nadat hul verhoor is voor die Suid-Afrikaanse regbank wie se onpartydigheid in wye kringe erken word.

Dit moet toegegee word dat oor die meriete van sekere gevalle waar persone verban is, gedebatteer kan word. Maar 'n slagspreuk van „release all political prisoners" laat 'n vraagteken oor die handhawing van die bestaande rus en orde in ons land. Die Staat moet eenvoudig sorg vir sy veiligheid as instansie om wet en orde te verseker. Hiervan mag ook die grootste individualis hom nie losmaak nie.

KOSHUISKOS

dente" moet visenteer vir versteekte wapens.

Laastens, veels geluk aan Leon van Aswegen met sy nuwe pyp. Mag julle lank en gelukkig saamleef.

Over de Voor

HIER kiek-kiep, daar kiek-kiep . . . Nee, wag, dit het niks met ons paar U.O.D.-studente te doen nie. Over de Voor het mos die trotse eenaars van 'n jong hoenderboerderytjie geword as gevolg van die bewondering wat Karljen vir ons koester. En nou moet ons net pasop waar ons trap — dis nou om nie die hoenders dood te trap nie.

En glo dit as julle wil, die Van Schiaks se alombekende Wit Cortina het jou wrintie geswig voor 'n Kewer.

Wat die rugby betref, 'n stywe handdruk aan P.G.D. Ons weet wanneer ons tweede gekom het.

Vergeet-my-nie

ONS het die nare siekte so lank as moontlik probeer uitsluit, maar op een of ander onverklaarbare wyse het hy tog hier ook ingesluip.

Simptome: Bleek gesigte, rooi oë. Pasiënt staar voor hom uit. Loop met lang haastige treë kamer toe en sluit deur agter hom. 'n Onverklaarbare neiging om medemens te vermy. Kennisgewings: „Stilte asseblief!" en afkondigings: „Die persoon wat op die derde vloer tusspring moet asseblief onmiddellik ophou!" Iewers probeer een nog 'n grappie maak en skryf op sy deur: Niemand het hom nog ooit doodgework nie, maar ek vat geen kans nie!"

Ja-nee, met sy lang lelike kloue het die akademie ons almal vasgeryp! Waar het die fout dan ingesluip met die begrafnis van die akademie? Johan?

Tog is die ligter sy van die lewe altyd daar.



KASKENADES

Hello PUKKE,

Vir party van julle is die toetstyd verby, en vir ander nie, maar die effekte dra nog swaar . . . Dis nou die tyd wanneer mens jou toets terugkry en sê: „Wat! Is ek sowaar deur? Ag nee wat, dan leer ek nooit weer nie". Of: „Wat! Het ek gevou? Nou leer ek nooit weer nie". Ja, so neem mens elke keer besluite — verniet. Dis nou die tyd om te wys julle het wilskrag. As jy dus nie wil leer nie, moet nie.

Terwyl ek so vasby voor die boeke, het ek, met apologiese aan „BY RIETFontein SE LEIDAM", die volgende neergepen . . .

„Hoog lê die boeke,
Breed lag die maan . . .
Stadig kom die outjie
na sy boeke toe aan . . .

Hoog lê die boeke,
Breed lag die maan . . .
Weg is die outjie,
en sy boeke bly staan!"

Ek voel egter, na jare van ondervinding, dat ek die eerstejaars tog 'n paar wenke moet gee oor eksamenskrif:

1) Moet nie „spot" nie. Onthou, die proffie „spot" wat jy „spot", en dan vra hy die ander.

2) As jy skryf, skryf eers dit wat jy weet, dan wat jy dink jy weet, en verder gorrel jy.

Julle weet, al die Akademie laat my dink aan Kasteel se klagte, en dan aan die Tegnie Departement . . . Ek glo nie julle moet te kras oordeel nie, Kasteel . . . Dink net hoe hard moet die mense werk . . . Ek bedoel nou, om elke toets- of eksamentyd iewers besig te wees met geraas sodat ons nie kan swot nie, kos seker heelwat beplanning en goeie tydsberekening. Of hoe . . . ?

Nou sê ek niks meer nie, behalwe „VASBYT".

— OOG.

Die verlowing . . .

★ Vervolg van bl. 6.

om sy erns te visualiseer. 'n Tweede tipe geskenk is dié wat gegee is met die oog op 'n toekomstige huwelik, soos meubels, ens. Sulke geskenke kan teruggeneem word aangesien die huwelik nie plaasvind nie.

Die laaste groep geskenke is klein liefdes-geskenkies. Hieronder val juweliersware, sjokolade en dergelike artikels. Sodanige goedere wat nie verbruik is nie, mag deur die onskuldige gehou word, maar die waarde word van die skadevergoedingseis afgetrek.

KOOP 'n LOOP-HAPPIE

HONGER ?

Probeer ons Vetkoek.

MAALVLEIS 25c.

KERRIE 25c.

KAAS en KONFYT 25c.

Sport

JAMES-HULLE DRAAI KRANE OOP TEEN RPM

DIE PUKKE het Saterdag op die Fanie du Toit-sportterrein kort duskant 'n halwe honderdtal in hul Neserbeker-wedstryd teen Rustenburg Platina Myne omgedraai. Hulle oorwinning van 45-3 is egter nogtans indrukwekkend en die grootste van hierdie seisoen in die superliga.

troue op skrumskakel. Tot dusver het die Pukke 197 punte in die liga aangeteken. 93 is teen hulle behaal.

Claassen, Ulyate dink ver terug

MNR. JOHAN CLAASSEN, lektor in Godsdiens aan die Potchefstroomse Universiteit en beroemde rugbyafrigter, en **Clive Ulyate**, hokkie- en krieketfrigter aan die Universiteit, dink met vanjaar se toetsreeks tussen die Leeus en die Springbokke met aangename herinnerings terug aan 'n vorige Leeutoer deur Suid-Afrika — die een van 1955.

Albei het met dié reeks vir die eerste keer hul Springbokrugbykleure verwerf en as sulks was dit een van die grootste hoogtepunte van hul sportloopbaan, indien nie die grootste nie. Hulle albei het in al vier die toetse van daardie jaar gespeel, as slotvoorspeler en as losskakel.

Johan Claassen het sedertdien een van die onvergeetlikes in Suid-Afrikaanse rugby geword en na 'n roemryke rugbyloopbaan van 28 toetse, waarvan nege as kaptein, is hy vandag voorsitter van die nasionale keurkomitee en afrikter van die Springbokspan. Bykans elke denkbare spits en eer op die rugbysveld het hy bereik.

Clive Ulyate het in elkeen

van die viertal toetse van 1955 taktiese spel gespeel en die swak plekke in die Leeu-agterlyn van daardie jaar (wat nog altyd bestempel word as die beste wat ooit op Suid-Afrikaanse bodem gespeel het) opgesom. Hy moet 'n groot deel van die krediet kry van die nege drieë wat die Springbokvleuels in die reeks gedruk het. (Theuns Briers het vyf gedruk en Tom van Vollenhoven vier.)

Tot vandag is nege vleuel-drieë in 'n enkele reeks 'n Suid-Afrikaanse rekord. 'n Hele paar daarvan is deur Ulyate op 'n skinkbord aan sy vleuels gegee om te druk; te wens sommige was so maklik gemaak dat 'n kleuter hulle sou kon aanteken.

Hyself het in die vierde toets 'n windmakerdrie agter sy naam geplaas en ook met 'n skepdoel geslaag. Sy goedgeplaaste hoë skoppe het in dieselfde toets tot minstens twee drieë deur Briers gelei.

Sewe jaar later, in 1962, toe die Leeus Suid-Afrika weer besoek het, was Johan Claassen die aanvoerder van die Springbokke in al vier die toetse. Terwyl hy nog op die kruin van die golf beweeg het, het hy aan die einde van die laaste toets in Bloemfontein, wat deur die tuisspan met 34-14 gewen is, as speler uitgetree.

Sy uittrede kon nie roemryker gewees het nie: Suid-Afrika het die reeks gewen, die span het 'n rekordtelling deur 'n Springbokspan op hulle tuisveld aangeteken, die toets was die aanskoulikste wat ooit in die Republiek gesien is en hy het sy loopbaan as speler afgesluit met 'n drie.

Dat -dit 'n pragtige wedstryd was kan daar geen twyfel bestaan nie. Agt primadrieë was op die spyskaart waarvan drie deur James Stoffberg, twee elk deur Barrie Barnard en Hennie Saaiman en een deur Piet Roodt. Willie de Bruin het die teltbord met 'n verdere 13 punte laat aanrol (drie straf- en twee doelskoppe).

Ná rustyd het die Puk-driekwarte skouspelagtig gekombineer en met skêre, fopskêre en afwisselende aanvalspanne

vorendag gekom. Twee van die vleuel-drieë het juis gekom van skêrebewegings.

Die voorspelers het nie verval in 'n losspelery nie, maar bymekaar gebly en gedraf. Jim van Rensburg wat in sy eerste wedstryd vir die Pukke se eerste span gehaak het, het soveel as nege vaskoppe ingepalm en net drie afgestaan. Hy raak nou vertrouwd met die tegniek van sy nuwe posisie.

Agterlangs was Schalk van der Merwe nog eens die Napoleontjie van die span. Hy

is beslis van provinsiale gehalte. Hoewel hy volgens die spankeuses nie goed genoeg is vir Wes-Transvaal nie, laat hy hom selfs nie deur 'n Springboklosskakel oorskadu nie. Die Pukke se reserve-losskakel Frans Barnard het op senter ook goed gedoen. Barnard en Saaiman is vleuels wat met min beweegkans 'n drie gaan druk.

Dries Swanepoel wat vir Theuns van Rensburg uit die eerste span hou, speel vir die eerste keer met werklike ver-



BO: Jim van Rensburg, gewese losvoorspeler wat die Pukke in die drie vorige intervarsityts aangevoer het. Hy speel deesdae haker en het reeds vir die eerste span in hierdie posisie uitgedraf.

(Foto: Fotokuns.)

Pampoenboere pootjie Reserwes byna

DIE Fanie du Toit-sportterrein bly maar vir die Pukke se 1B-span die ongelukkigste veld waarop hulle kan speel. Hulle kom hier net nie op dreef nie.

Saterdag was dit weer so en Landboukollege het hulle so hittede oor die afgrond gehelp, 'n Oorwinning met 'n enkele punt (22-21) het hulle egter nogtans twee ligapunte besorg.

Trans-Agric het die Pukke se lusteloosheid mooi uitgebui en op hulle beurt briljant



BO: Theuns van Rensburg in aksie toe hy nog vir die Pukke se eerste span skrumskakel gespeel het. Deesdae verteenwoordig hy die 1B-span in hierdie posisie. Hy moes vir Dries Swanepoel plek maak nadat Swanepoel die afgelope tyd puik spel gelewer het.

verdedig. Nooit het hulle die Pukke toegelaat om weer soos in die spanne se eerste wedstryd, wat deur die Pukke met 29-9 gewen is, deur te hardloop nie.

Die punteverskil was gewoonlik een of sewe punte. Wanneer die Pukke een punt voor was het hulle ingeklim, maar met 'n voorsprong van sewe lyf weggesteek. Een keer is Landboukollege toegelaat om 'n bal van binne hul eie gebied deur te dribbel vir 'n drie.

Die pampoenboere verdien krediet vir die wyse waarop hulle die Pukke se foute uitgebuit het en dan natuurlik vir hulle verdediging. 'n Span speel net so goed as wat sy teenstanders hom toelaat.

Vir die Pukke het Hein Mentz, Phillip Burger, Nic Kotzé en Leon van den Berg drieë aangeteken. Phillip Burger het met drie van die doelskoppe geslaag.

Landboukollege se punte het bestaan uit drieë deur Piet van Blerk, Kobus Winter en Johan Wessels. Wouter de Wet het al drie verryf en 'n strafdoel bygevoeg.



BO: Mnr. Piet Malan, direkteur van die Sportinstituut. Hy en sy mense is nog hard aan 't soek na 'n naam vir die Puk 1B-span. Hulle het 'n wedstryd uitgeskryf waarin die persoon wat die beste naam voorstel twee rugbytoetskaartjies kan wen. Inskrywings kan nog tot die einde van die semester gedoen word.

(Foto: Fotokuns.)

12 Pukke in proefspanne

TEN einde laaste het die Wes-Transvaalse rugbykeurders tot besinning gekom toe hulle twaalf Pukke ingesluit het in hul proefspanne wat Woensdagaand op Olënnpark 'n proefwedstryd gespeel het. Die Wes-Transvaalse span wat op 29 Junie in 'n Curriebekerwedstryd teen die Westelike Provinsie op Nuweland speel, sou na afloop van die wedstryd gekies word.

Sewe Pukke het vir die A-span opgedraf. Hulle was Willie de Bruin (heelagter), Eugene van Wyk (senter), Barrie Barnard (vleuel), Schalk van der Merwe (losskakel), Dries Swanepoel (skrumskakel), Piet Brand (slot) en James Stoffberg (agtsteman).

Vyf Pukke was ingesluit in die B-span, naamlik Piet Roodt (senter), Hennie Saaiman (vleuel), Osie van Niekerk (stut), Eric le Roux (flank) en Dries Coetzer (slot).

Pluimbalspan

DIE Suid-Afrikaanse Universiteit Pluimbaltoernooi vind vanaf 2-9 Julie in Kaapstad plaas. Al die blanke universiteite sal aan die toernooi deelneem.

Die spelers wat die Puk sal verteenwoordig, is:

Mans: N. Lindeberg, A. Evans, J. van As, A. Olivier, C. de Wet, C. Kotze en M. du Toit. Dames: R. de Klerk, G. Basson, S. Ludick, M. Liebenberg, A. Earle, H. Janse van Vuuren en I. Swart.

Gimnaste se toerprogram

DIE P.U.-Gimnastieklklub gaan die wintervakansie in Rhodesië toer. Die span vertrek met die aanvang van die vakansie op Vrydag 28 Junie uit Potchefstroom en keer op 23 Julie terug.

Die toer sal uit sestien optredes bestaan. Dit sluit vertonings in vir die Rhodesiese Lugmag by Kariba en vir die Rhodesiese en Suid-Afrikaanse Magte by die Victoria-waterval. Die span sal ook twee vertonings vir televisie-uitsendings lewer.

Die doel van die toer is hoofsaaklik fondsinsameling, maar sal terselfdertyd dien as proefskool vir 'n moontlike oorsese toer.

Die Wapad word gedruk deur die Potchefstroom Herald (Edms.) Beperk, Olënlaan 11, Potchefstroom.

Die span wat onder leiding van hul afrikter, mnr. Koos de Wet, 'n voormalige Springbok-gimnastiekafrigter, staan, sal in die volgende sentrums optree:

Figtree (1 Julie); Plumtree (2 Julie); Televisie-vertoning, Bulawayo (3 Julie); Bulawayo 4, 5 Julie; Fort Victoria (8 Julie); Gwelo (10 Julie); Que-Que (11 Julie); Televisie-vertoning, Salisbury (12 Julie); Salisbury (12 Julie); Kariba (13 Julie); Sinoia (15 Julie); Salisbury (16 Julie); Marandellas (17 Julie); Umtali 18 Julie; Melsetter (19 Julie); Fort Victoria (22 Julie).



MOTOLEK
Hierdie onderdele is by u plaaslike **MOTOLEK** verspreider verkrygbaar...

POTCH SPARES

Lombardstraat 39, Tel. 6077, 4595,
POTCHEFSTROOM.

ELECTRICAL PARTS FOR JAPANESE CARS & TRUCKS.

—ST